



Lugo, a 31 de xullo de 2012. No Pleno da **Deputación de Lugo** de hoxe foi aprobada **por unanimidade**

unha moción do Bloque Nacionalista Galego na que se pide que a Deputación Provincial traslade á Xunta a

solicitud formal de que a Cova de Eirós de Triacastela sexa declarada como Ben de Interese Cultural

. Á súa vez, todos os grupos con representación política na Deputación foron instados por ADEGA e a Asociación sociocultural de O Iribio a posicionarse ao respecto da máxima protección patrimonial legal deste xacemento paleolítico.

Ambos os dous colectivos xa pediran a declaración de BIC para a Cova de Eirós en xullo de 2009 e, de novo,

[en maio deste ano](#)

diante da Dirección Xeral de Patrimonio Cultural sen, polo de agora, obter resposta por parte deste departamento da Xunta.

Desde o punto de vista de ADEGA e da Asociación Sociocultural do Iribio, a Cova de Eirós de Triacastela garda no seu interior un valioso patrimonio arqueolóxico, con restos de fauna e flora do cuaternario, entre os que os que destacan as pegadas do *Ursus spelaeus* (oso cavernario) que demostran que esta especie habitou nesta cova. Isto é moi importante xa que estes restos do Oso cavernario na Cova de Eirós indican que Galiza é o hábitat máis occidental onde morou esta especie do Pleistoceno. Así o mostran os traballos da doutora Aurora Grandal e do doutor Xoán Ramón Vidal Romaní da Universidade da Coruña.

Ademais, no ano 2008 arqueólogos vencellados ás universidades de Santiago de Compostela, de Cantabria e da Rovira i Virgili, confirmaron a fins do verán pasado o achado de materiais líticos que, sen dubidar, están adscritos ao Paleolítico Medio, datados por cronoloxía absoluta en 118.000 anos, e no Paleolítico Superior, datados entre 29.000 e 22.000 anos, correspondentes ao período Gravetiense, o dos humanos neandertais, até agora inédito en Galiza.

Tamén, como resultado destas escavacións aparece un colgante datado en 26.000 anos, encontrado na zona máis externa da Cova de Eirós, e unha agulla de coser que nos mostra xa

unha serie de habilidades adaptativas para a construción de roupa de protección para o duro clima que, naquela altura, había no territorio, máis frío do que na actualidade.

ADEGA e a Asociación sociocultural do Iribio congratúlanse de que o Organismo Provincial de Lugo se una ás súas reclamas de protección deste xacemento de grande valor histórico e salienta a importancia da súa localización nas proximidades do Camiño de Santiago, o que lle podería dar aínda un maior valor engadido a este punto da rota dos peregrinos, como unha xanela aberta á nosa historia máis recuada nos tempos.